

ԱՄՍՈՒԱՅ ՏԵՍՈՒԹԻՒՆ

ԻՆՉ ԵՆՔ ՍՊԱՍՈՒԾ ՎԵՀԱՓԱՌ ԿԱԹՈՂԻԿՈՍԻՑ

Եթէ ուշադրութեան չառնենք հայոց եկեղեցու անկեալ դը-
րութիւնը մինչև Դաւիթ-Դանիէլ կաթողիկոսների կռիւների վեր-
ջը՝ էջմիածինը երբեք այսպիսի ողորմելի և սնանկ վիճակի մէջ
չէ եղել, ինչպէս այսօր։ Հանգուցեալ Հայրապետի ան-
իշխանութեան հասնող բարի բնաւորութեան պատճառով բոլոր
մեր հաստատութիւնները քայքայուեցան, շնորհիւ մեր եկեղեցա-
կան վարիչների ապիկարութեան և վախկոտութեան, էջմիածնի
և միւս վանքական կալուածները զրկուեցին իրանց եկամուտներից,
դպրոցների հաստատութիւնները ընկան թեթևալիկ մարդկանց
ձեռքը և հայ ժողովրդի վիճակը տնօրինողները դարձան մարդիկ,
որոնք հայ ազգի գաղափարական ձգտումները սպանեցին, ոտնա-
կոխ անելով ամեն սրբութիւն։ Հասարակական խնդիրները և
պաշտօնեաների վիճակը սկսեցին տնօրինուել կուսակցական շա-
հերի ազդեցութեան տակ։ Եւ այսպիսի մի ծանր ժամանակ նոր-
ընտիր կաթողիկոսի առաջին քայլերից է կախուած նրա ապա-
գայ գործունէութիւնը։

Առաջին խնդիրը, որ կարօտ է լուծման, էջմիածնի և վան-
քերի տնտեսական դրութեան բարւոքումն է։ Նախ պէտք է էջ-
միածնապատկան հողերում ապրող գիւղացիների հետ յարա-
բերութիւնը կանոնաւորել և հողերը տալ հայ ժողովրդին,
պահելով էջմիածնի կրթական և տնտեսական կարիքները
ապահովելու համար յայտնի քանակութեամբ հող։ Երկրորդ՝
պէտք է մի որևէ մասնաւոր առևտրական ընկերութեան
միջոցով մտածել էջմիածնի ազատ մնացած հողերի բարւոքման
մասին։ Երրորդ՝ պէտք է նոյնպիսի ընկերութեան միջոցով վան-
քապատկան այլ ազատ մնացած հողերի և հանքերի մշակման մա-
սին հոգալ։ Չորրորդ՝ պէտք է հոգևոր դպրոցների և թէ՛ ծխա-
կան դպրոցների կանոնադրութիւնները և ծրագիրները ձեռնհաս

մարդկանց ձեռքով վերաքննութեան ենթարկել և նրանց մասին հապճէպ կերպով հրատարակուած և անմշակ կարգադրութիւնները նորից վերաքննել ու փոխել այն բոլոր կէտերը, որոնք պատճառ են լինում մեր դպրոցների խառնակ դրութեան: Հինգերորդ՝ պէտք է վերջ տալ էջմիածնի միաբանութեան մէջ տիրապետող մանր և անարժան ինտրիգներին ու կռիւներին:

Յայտնի է, որ մեր վանքաբնակ հայրերը իրենց ժամանակի մեծ մասը գործ են դնում միմեանց դէմ դատաստանական գործեր ստեղծելու, այս կամ այն հղբայրակից վարդապետի կամ սրբազանի հարիւր տարի առաջ գողացած 5 կամ 10 ուրբի փողի մասին գրելու և հերքելու վրայ: Այս բոլորին պէտք է վերջ տալ: Վեցերորդ՝ պէտք է ժողովել էջմիածնի հին միաբանները, որոնք իրենց բոլոր պակասութիւններով հանդերձ՝ միշտ աւելի շատ են մտածել և հոգացել էջմիածնի տնտեսական և կրօնական շահերի մասին, քան շատ երիտասարդ գիտնականներ: Երիտասարդ վարդապետներին պէտք է ուղարկել պաշտօններով ժողովրդի մէջ գործելու, ուր աւելի լայն ասպարէզ կայ նրանց երիտասարդական եռանդի համար, որը էջմիածնում նրանք վատնում են անմիտ պօլիտիկանութեան փոքրոգի ինտրիգների վրայ: Եօթներորդ՝ պէտք է էջմիածնի ճեմարանը իրօք դարձնել մի բարձրագոյն դպրոց, մի համալսարան, ուր կարողանան աշխատել ընդունակ հոգեորականներ և աշխարհականներ առանց թոյլ տալու, որ նրանց վիճակը ամեն օր խաղալիք դառնայ ողորմիլի մարդկանց ձեռքին:

Հայրապետական Դիւանը պէտք է կառավարել ոչ թէ 20 ուրբիանոց գրագիրների ձեռքով, որոնք ընդունակ են պատահական մարդկանց ձեռքին խաղալիք լինել, այլ լուրջ և պատաստուած անձանց հաւատալ այդ կարևոր պաշտօնը, որպէսզի կառավարութեան հետ ունեցած յարաբերութիւնները չնչին պատճառներով չխանգարուին և Հայրապետը ծանր դրութեան մէջ չընկնի այդ պատճառով:

Այս ամենը գործունէութեան ընդարձակ ասպարէզ է բաց անում ամենայն Հայոց Վեհափառ Կաթողիկոսի առաջ, որ իւր կորովի կամքով և խելամիտ փորձառութեան շնորհիւ անկասկած կարող կլինի բարւոքել Հայ եկեղեցու և ժողովրդի ներկայ աղետալից կեանքի ծանր պայմանները: